



百字論
解拳論
掌中論

元魏天竺三藏法師菩提流支譯
陳三藏法師真諦譯
唐三藏法師義淨奉制譯



清刻龍藏佛說法變相圖

三論同卷

逸四

百字論

解拳論

掌中論

百字論

逸四

提婆 菩薩造

元魏天竺三藏法師菩提流支譯

我今歸依聰睿師 厥名提婆有大智

能以百字演實法 除諸邪見向實相

說曰何故造論為破我見等一切諸法各有

自相

僧佉曰一切法一相是我要誓說以何因緣
立一切法一相以盡同共有一故喻如瓶衣
等物體各有一以是義故當知一切法名為

一相是故一義成內曰非一何以故汝要誓
言立一相義爲一爲二若是一者唯有要誓
不應有一以是因緣汝所立一此義即破毗
舍師曰汝言一破我今立異捨一過故內曰
汝若立異我還立一何以故汝若離因立異
我亦離因立一毗舍師曰我要立異所以者
何諸法差別各異相故喻如象駝鹿馬如是
等類其相各異以是故諸法相異一切法皆
異是故異義成內曰汝以此彼相不同故言
異義成者以相別故法各是一汝所立異要
言則壞要言壞故則知異相不立外曰以一
異相不成故我今立有相以法各有相故當
知有相義成有相成故當知一異亦成內曰
汝今立有必應有因若無因而立有我亦無
因而立無外曰我要言立一切法有何以故

現見諸法各有相故喻如虛空中華無有體
相故不可得瓶衣等物現有用故當知一切
法皆是有相以是因緣故有義得成內曰汝
立有者因有相故有因無相故有此二相俱
有過若以現相故成有義者現相是有有亦
是有二有理不相成若言因無要誓則壞有
無俱非因故有義則破外曰若破我有汝則
立無無義得成有還得立喻如世人飲食先
因麤澀故有美好以是故汝破我有當知是
無內曰汝立無者因何而成汝若無因而成
無我亦無因而成有外曰云何而知以無體
相故喻如熱時燄自無體相何況而有少水
可得以是因緣故一切法無一塵相可得是
故我立無義成內曰汝所立無爲有因爲無
因若言無因空有要誓若言有因要誓則壞

汝若無無亦不成外曰一切法有因汝破有無者此義則不然何以故如有泥縷蒲葦等故知一切法皆有因內曰無因汝言有因故有有因則是無若泥中先有瓶泥蒲縷等皆非是因何以故因中先有故若因中先無亦非是因喻如沙中無油沙非油因若言亦有亦無義亦不成何以故有二過故復次有亦不生無亦不生若從無因生因復何用爲若從有因生要誓言則壞汝先言一切法皆有因生者此事則不然外曰現有瓶衣等用故則知一切法皆從因生不相形故成內曰汝言有果故有因此義不成何以故相形有故若以見果有用故言有因者果亦是因果若是因則無果無果故則無因是故因果俱壞若言從意自在時方如是等因生則是相形

因便是有爲有爲法則無常自在時方相形而有則不因成外曰我所言真實先舊諸仙作如是說此法決定終無有異內曰汝言法爾此非正說如我所說與汝法異汝法中所有我法中則無我法中所有汝法中則無何以故汝言我法爾故汝法若爾則但自是自是而說則無理趣若無理趣則無所知若有所知更說勝因若無勝因而言法爾則無道理外曰此是我家法內曰汝言我家法其法則不成汝法不自成云何能成法若當離因者終無有所成自是其法者此則非正理外曰無法非因生如兔角龜毛石女兒虛空華等如是無法終不可得以因緣生如見壓油求麻作瓶求泥非以一法爲因能生多法而物各有因如泥能成瓶不爲壘因縷能成壘

不爲瓶因以此類求餘法亦爾內曰汝言因能生者因不能生此因爲有所成爲有所壞若因有所成汝亦成我若因有所壞壞我亦壞汝以何爲喻如火能燒物燒汝亦燒我若於彼處熱在此亦復然復次更明少義若言有因而成汝亦成我因雖有所生因法不俱成汝立聲法是常作要誓說以何爲因無身是因以何爲喻虛空爲喻虛空者無身而常以是故名聲作常復有異說名聲無常以何故聲是作法故無常以何爲喻如瓶因泥輪繩人功水等而成瓶以作因生故瓶無常如聲從唇齒喉舌衆緣生故聲亦無常非此二因能有所成汝言真實其義有成妄說虛因理則不立汝說要誓有要時無誓有誓時無要二字不俱要誓則壞如因法未生非

爲因以滅亦非因如子未生不名爲生以滅亦非生以是故無因外曰汝雖破因果我說有我法故因果則還成內曰汝言有我法以何爲體若以知識爲我知識則無常知瓶智以滅知疊知始生若知識非我我則無知我若無知則無苦樂如是之我則無體相若言我與智合故我有知知與我合故知亦非知外曰有我所以者何瓶衣等物是我所故當知有我內曰有一過故瓶與有一不異故有一若瓶非瓶有一亦應是瓶是則多瓶若有一非瓶是則無瓶外曰有一瓶一故有過我今立異捨一過故內曰汝說異則無瓶有無故無瓶喻如異比丘異婆羅門當知無比丘婆羅門若瓶異有則是無如刀與鞘有異可見瓶有一異亦應可見今有一異不可見故

異義不成外曰一異雖壞現見有瓶喻如虛

遠四

五

空中華無故不可見瓶現見故當知有瓶內
曰不見何故不見汝言現見爲眼見爲識見
若眼見者死人有眼亦應見若識見者盲人
有識亦應見若根識一一別不見和合亦不
見喻如一盲不能見衆盲亦不見外曰有瓶
有色故有瓶內曰汝言有色故有瓶色與瓶
爲一爲異瓶色若一見餘色時亦應見瓶若
色異瓶瓶非可見則無瓶若以見爲瓶瓶在
障處眼不見時瓶應非瓶若色與瓶一瓶壞
時餘色亦應壞外曰我法不生不滅見亦不
壞不見亦不壞何以故我法常有故因中有
果微細不現以先有故後得成大以是故知
有因果內曰先有不須作如泥有瓶不須陶
師如縷有氎不須織師以瓶氎待工匠成故

知因中無果若因中已有果者則無未來法
若無未來法則無生滅無生滅亦無善惡無
善惡亦無作業罪福果報如是則一切法無
復次若因中先有微細果而無麤者是麤便
先無而後有是則生滅違汝先說又若微細
先有則非生法非生法故則壞三世三世若
無當知一切法亦無若因中先有果乳中已
有酪若言先無而後有者當知是作法以是
故一切法因中先有更不須作外曰若因中
先有果是過者今說因中先無而後果生離
無生滅是故無過有生滅故亦有亦無內曰
無生有生非一時故若瓶泥中已有不須輪
繩人功等成若無如龜毛不可紡織令使有
用以是故有亦不生無亦不生又受身爲自
生從他生二俱有過若自生更何用生以是

遠四

六

故自生無身若不從自生云何而從他若言
自他生是亦俱有過以是故一切法無生外
曰若無身不應有生住滅有爲三相若有有
爲則有無爲有爲無爲成故一切法亦成內
曰無有爲法汝言三相爲次第生爲一時生
次第亦有過一時亦有過若次第生時無
住滅住時無生滅滅時無生住以是故不得
次第生又若生有住生自無體住何所住生
體自無住云何有無生無住如石女兒是則
無法若有生住爲滅所滅生住既無滅何能
滅如壞兔角空有壞名外曰汝言生住滅次
第不可得有爲相如二頭三手不可得三相
亦不可得若三相一時亦不可得何以故若
生中有滅生則非生若滅中有生滅則非滅
住中生滅破亦如是生滅相違云何一時以

遠四

七

是故三相次第生不可得一時生亦不可得
又汝言三相爲與有爲作相爲與無爲作相
若與有爲作相生是有爲應有三相住滅亦
爾如是之相則爲無窮相若無窮汝不應說
有爲法但有三相要誓則壞若相相無爲云
何有爲相而能相無爲外曰汝若不欲令作
有爲相應作無爲相何以故無爲遍一切處
無方所故是故應與無爲作相內曰無爲有
方所我今問汝虛空爲有方所爲無方所虛
空若有方所應在汝身邊亦在彼身邊若爾
便是有分有分則有邊若言虛空無方爲汝
身遍虛空虛空遍汝身若虛空遍汝身汝身
遍虛空是則有邊際如瓶衣氎等有邊故無
常虛空爾者亦是無常又復常因能生常果
因若無常果云何常如因泥生瓶泥無常故

瓶亦無常有方所故名爲無常又復汝所言常有因故常無因故常二俱有過若言從因生是常者如瓶衣等物從因生故皆亦無常汝若以離因生法是常我亦以離因生法是無常若必有離因生法而常者爲是稱理言爲是偏黨說今應分明更說其因外曰因有二種作因了因從作因生是無常如瓶衣等物作因生故無常從了因法是常如燈能照闇中衆物闇去物現非作法故是常以是故從作因生者是無常從了因生者是常內曰如瓶等物現見故是有無爲非現見故是無何以故無爲無體相故無法捨有捨無二俱捨故能斷我見及我所見便得涅槃如經中說如智境見一切法空識無所取故心識滅種子滅外曰若有爲法無體相云何而有實

內曰如夢世諦法皆如夢夢非實有又非是無亦非無因如世諦法非有相非無相非無因如似屋宅若有體相未作時應見若言無不應得見假梁椽基壁故而有成用非是無因以是故一切法非是有非是無亦非無因是故如夢外曰若一切法如夢老少中年取瓶時何故不取甕等取甕時何不亦取瓶等今見取瓶不取餘物以名有定故當知一切法不如夢內曰名非是體若名是體如有瓶名即應便有盛乳酪等用如世智人言但瓶空名已有用者不應復須陶師造作出價市瓶如身有三名若男若女非男非女以身取名則統於三若以名求名則三不相攝是故名體有異復次如瓶有聲可聞有色可見瓶與觸亦得如是則有多瓶又瓶有口脰底腹

是名非一復應多瓶以此觀察名字虛假當知無實如佛所說偈

世間有假名 相如熱時炎 音聲猶如鼓 世間相如夢

外曰汝雖種種破法是有若言有法則壞汝說若言是無無何所破內曰汝法有體相我則有所破若本無體者則我無所破說曰

大人平等相 心無有染著 亦無有不染 都無有止住 諸有體相者 有欲及斷欲 成就不壞信 而捨諸邪見 蠲除邪見網

衆穢悉滅盡 能棄三毒刺 勤行修此道

善察如是法 深生信敬心 信心求實法

不趣向三有 不取於無有 得證寂滅道

一切法無一 如是法無異 云何是有相

因法則無體 非相形而有 自是法不然

汝法則不成 如此不用因 汝當說體相
一則是有過 若爾則無體 五情不取塵
色法有名字 所見亦無體 以有不須作
彼法無有生 有爲法無體 如此亦有方
等如夢無異 相亦無有體 此是百字論
提婆之所說

百字論